

四庫全書

集部

欽定四庫全書

集部

粵西文獻卷七十一

詳校官庶吉士臣瑚圖禮

主事銜臣徐以坤覆勘

總校官庶吉士臣朱 鈐

校對官中書臣王鍾泰

謄錄監生臣卽 颺

欽定四庫全書

粵西文載卷七十一

桂林府通判汪森編

傳

人物

呂調陽字和卿臨桂人父璋以貢起家令徐聞有惠政
母張夫人夢巨蟒入室寤而生公嘉靖庚戌榜眼授翰
林院編修三任成均擢貳禮卿侍莊皇帝講讀以經傳

款款感動數嘉納之神宗即位拜禮部尚書尋為大學士加吏部尚書時張居正柄國以申韓法操切天下公共事六年委曲調劑會病肺請歸門無私謁人多誦其清風上嘉公朴忠嘗手書樞機克慎及同心夾輔大字賜之每燕對稱先生不名公歸歲餘卒謚文簡

何以尚興業人嘉靖壬子舉于鄉授建昌司教歷戶部司務會戶部郎海瑞上封事觸忌諱世宗震怒下詔獄公抗疏救之上并怒公杖一百俱繫獄穆廟登極錄用

諸直臣公由司務晉光祿寺丞公益慷慨論列時輔臣
高拱用事公列其罪狀比之蔡京拱銜之甚卒坐外謫
遂辭疾歸及拱罷言官薦公拜雷州司理累遷至鴻臚
寺卿晉太僕卿致仕歸所著有忠孝經便蒙詩訓

陶守訓字允徵平樂人嘉靖壬子舉于鄉事繼母以孝
聞授望江學諭繼母卒哀毀踰禮望江士人有江亭遺
履記服闋擢知三水縣民有鬻子完稅者憐而贖還之
通判應天旋擢南戶部即出守鎮遠撫苗夷通商旅建

橋梁民德之在任十月乞休歸囊無餘貲

高應暘字貞所宜山人嘉靖壬子舉人任浙江龍游教諭課士有賢聲陞奉化知縣剔奸摘伏如神丰采嚴峻人不敢干以私後以艱歸所著有青鳥山人集

王化字汝贊馬平人為入圓背豐下目炯炯如電少倜儻有大節而好奇謀世居郭外峒獐忽引其黨來掠公披撞衣雜羣輩與俱出入識其鄉導乃里中惡少取泥塗手佯撫其背曰兵至矣盍歸已而官兵四集公曰某

人者寔導賊試招之出禦彼恐人疑必來其背有掌迹
者是也衆驗之果然送官笞殺之後三日賊又突至公
已偵知之躬率數人伏其間候賊半渡蹴而擊之擒斬
十七人餘盡溺死羣獍公謀發公墓公窮日夜驟增
其壤賊至火光中見與初墓迴異疑為鄉導者所誤竟
解之去墓賴以全嘉靖庚戌之變公從父職方公城上
望見寇大呼曰得壯士數十人可破也職方公目攝之
乃止未幾職方公坐累係若盧公為擊登聞鼓雪之聖

怒旋解得出名振京師壬子舉于鄉己未授湖廣石門
教諭壬戌以最遷廣東平遠令平遠故賊藪崑險湍悍
賊突竄箐石中動以萬計輕器妄走江閩間咸被其害
當事者建議設總兵并伸威道猶不能制至是乃請縣
之公初至謁督撫即詣行縣督府遽止之曰今賊勢如
炎奈何先失吾令公捫然起曰不可縣立也新而不置
官賊心益不安且我不入當誰入者竟單騎以往進其
父老諭之曰若屬盤牙有年罪不可赦我既奉命來為

若父母一切熟惡寘不問所不悛者有一劒耳衆叩頭
唯唯公高睨大度日坐草亭中治事闢垣壘物土宜興
教化復邦賦蚤紕晏思推誠已責凡所以卵翼之甚備
一日長田人假牌捕賊公輒庭數之曰環視皆吾良民
捕者為誰長此不已使人人自危立榜殺其人衆皆感
泣羅拜曰始見公之膽而已今乃見公之心矣於是各
寨盡出所掠民間子女一時扶攜歸者三千餘人間巡
行寨中至則呼其酋治食食畢則斲卧以兵餉置其家

又時時命優人辦演雜劇所謂忠孝故事以聳動之無
不疚心思復怛若創痛仰閱燠咻姁姁有更生之樂矣
一日南康被圍劇賊李文彪者寨倚懸厓前為木城機
礮石以待公入援覓羊數百頭帚其尾夜從之上賊見
火疑已登城遽發其機石累累飛霄我兵力戰公由懸
厓徒步自後入從數十人齊跣之且擊且射衷其衆賊
大敗文彪跳身去已而備江日照于會昌截葉丹樓於
石鎮殲溫鑑於程鄉破伍端於成江口所向無前遠近

諸巢穴見平遠旗幟望風披靡多折戈降者而梁國相
獨負其驍敢屢服屢叛南贛徵兵討之公念曰國相梁
寧旅此誰賊而馳騫擊之我城未固家屬栖荆棘中猝
乘虛至吾事去矣於是寄之會昌臨行指其幼子元與
妻計氏訣曰吾令行未知勝負所在脫有不測謹護此
兒歸慰我兩親耳直抵黃沙石子嶺與賊遇我兵少却
公怒馬先之獲三人殪三十餘人明日督兵搗巢賊懼
使人來會昌曰王平遠陳亡矣計拊膺大慟遂自刎死

報至公不為動曰狡賊乃敢警傷吾妻子乎我男子也死且不顧寧顧家邪諸君皆飲泣自奮公乘銳崩之面縛國相等八十餘人賊黨悉平乃赴哭於會昌隨購得賊所用間者戮於市聞者莫不稱快部使者上其事世廟兩賢之乙丑詔所在立祠祠計氏而公即晉為廣東按察司伸威道副使丙寅大征二源時五哨進兵公居其中賊獨多山獨險兵獨少先是英德哨失利坐踣者五六百人賊積骷髏為山謂之人頭山公詢土人得其

危塞夜從撐腰石襲登土嶺天明衆見前人頭山又嶂
複木深無不股弁咸欲出議請濟師公曰勝敗無形唯
計之得況我兵已深去賊不遠萬一因我退出覆諸歸
路夾而虜我則一人不可生矣乃眇兵目莫成曰鼓之
分左右中三路以進賊有赭旛者振飛而上莫成一矢
斃之羣賊牆立公拍馬爭下橫衝直突應手而倒公追
至牛神逕會暮斬首百二十級次日由間道復進見賊
衆坐寨中以為前英德哨兵燼略無懼意公遽勅旌第

凌巔設奇制敵賊潰尾其後遂傾巢大破之前後斬首
一千六百有奇深谿絕峒之間幾無噍類矣公遇敵輒
奮臂當先短衫敝屣與士卒同結束數有人至軍者皆
不識語之亦不信營中薦草假息不責供張濁漿糲食
若厭梁肉其於懸車束馬之隘徒行至數百里不勸公
既甘苦食淡行間所得貲財人得自有之下走馬卒亦
使之得以盡言以故顛倒才知柔馴辯彊皆樂為之用
然性慷慨臨事裂然高斷無所退讓捐身赴公不肯苟

為媿姻自二源之役廣贛兩督府主之兵馬錢糈廣七
而贛三公據實報功而禍繇此胎矣適公以職方公喪
歸忌者遂以蜚語中之公既逮百姓聞之哭聲震天相
與詣闕上書上亦廉其無罪尋以僉事備兵惠潮云公
在廣贛間先後十二年名賊宿猾帽公稜名已久至是
皆麋至公拒之曰我去則叛來則降是二心也其酋泣
對曰公招某等無猜無擾天施露覆那得不服若其他
則直視為賊耳唯賄是聞無賄則蠶粉矣今日之來進

退生死唯命所不敢怨公為之於邑乃復署為兵或疑署賊為兵安所得餉公曰彼皆吾民也故皆有田撫之失道則聚為賊而疽食于他我且不得其用業撫之矣彼還為民其田自在也我得其力彼得其田所謂兵餉兩足何復議餉哉公唯臨陳交綏不少假借及渠魁授首餘黨悉為安置與之生產所全活不下數十萬其已降而健戰者即分部之麾下無有異同以故同時用兵者兵日增餉日費猶苦不枝而公以賊攻賊因糧於敵

不煩厝計而功已成前此所未有也未幾復丁內艱甲戌以大察失其官居家農圃自娛人罕識其面公僚友羅野庭嘗稱之曰中年三異公有六焉明經起家而精武技一異也眇小丈夫而饒膽勇二異也征伐武事而兼陰德三異也清白廉吏而好施予四異也疾惡剛介而能容忍五異也臨敵應變神竒百出而居常與人要約一言終身不易六異也識者以為知言初公馳驅戎馬間百戰之威未嘗少挫峒賊聞之皆稱為殺人王公

愀然曰我世奉儒素而徒徼狂疾之功以為名此豈我心哉第臨敵難於兩全吾不敢效宋襄陳餘之事則不得已為朝廷百姓屈也此心亦付之天耳死之日引火焚其書曰無為子孫累也子元舉孝廉有父風

魏文瑞字麟卿臨桂人性聰悟學鍾王楷書又喜摩詰山水頗盡其妙中嘉靖壬子鄉試授定州學正陞灤縣知縣丁母憂補漳平會龍嵩賊蘇阿普漳平賊楊一聚黨五六千永安大田連城清流諸寇騷然響應賴撫檄

文瑞合三縣兵勦之即以除夕統兵行元旦次曹寨白
龍崙曹姓者賊謀主也賊緣是伏員當以待越三日至
員當伏者四起文瑞遇害事聞贈光祿少卿廕一子

蔣煒字子厚全州人嘉靖癸丑進士改庶吉士授御史
方入臺遣監刑見楊員外繼盛在刑中煒即為具奏曰
楊繼盛越職妄言自取重辟其妻哀懇願以身代夫匹
婦何知一死非易繼盛既不能將順聖明又何能儀刑
寡妻此必中有激而然也繼盛就刑妻必并命恐傷陸

下好生之仁令匹婦立義千古願陛下將繼盛暫緩其
死勿令下車泣罪惟禹以一女子上書貸父惟漢文則
後誦陛下之仁超軼二帝矣奏上不報繼盛死於市煇
內不自安未幾移病歸卒

張翀字子儀柳州人幼倜儻為文操觚立就嘉靖癸丑
進士授刑部主事與同舍高岱董傳策以氣節相砥礪
相嵩當國時楊員外繼盛沈經歷鍊以直言棄市會給
事中吳時來疏嵩父子奸狀翀與傳策章繼上俱下詔

獄訊所主使者卹獨對曰臣自求為社稷死耳疇能主使者即有罪臣三人自當之會地震上怒解發煙瘴地方永遠克軍卹戍都勻諸生日執經侍講卹語以忠孝大節及性命之旨曰性命非懸空者離倫物談性命非真性命也乙丑嵩父子伏辜丁卯穆宗登極召補吏部驗封郎晉大理少卿尋轉右僉都御史巡撫南贛汀韶督軍事至則撫流民遏峒寇平三巢又遣兵解惠州之圍疊承金綺之賜念犴犴為西粵梗疏請先剽古田次

及八寨則百粵無煩南顧天子避之後悉如所策四年
巡撫湖廣五年晉大理卿兵部侍郎疏乞歸養萬歷二
年起兵部侍郎兼右僉都御史總督漕運丙子入為刑
部侍郎累疏乞休歸己卯秋卒于家卹氣節才猷為海
內所仰重所著鶴樓集十二卷傳於時

鄧宗孔崇善人嘉靖癸丑進士授都察院都事後陞金
華知府治有賢聲

楊際熙領嘉靖戊午鄉書令松滋召拜御史敢諫不避

權貴萬厯初論松江豪撓梗錢法稱旨擢雲南僉憲以終養乞休子允京領鄉書令溫縣廉介有父風時稱楊氏世家云

楊繼文字獻國容縣人嘉靖戊午舉人令海豐轉判武昌守沔陽州咸有惠政晉瓊州貳守招降巨寇李茂

何敦復字學閔興業人嘉靖辛酉舉于鄉司駕部務轉員外郎剛直不為同官所容謫判姑熟移丞潮州清介自矢時延諸生談藝潮人以配祀昌黎云

舒應龍字中陽全州人嘉靖壬戌會魁令東莞發奸摘
伏如神歷官至漕運工部尚書修河有功致仕歸子弘
志萬厯丙戌探花

唐廷燦號振東全州人嘉靖甲子舉人知石城縣為政
仁愛居鄉積善兄弟父子祖孫曾孫皆春秋登賢科凡
十三人蟬聯弗替人以為世德之報云

張守約字希曾永福人嘉靖乙丑進士官至御史時嚴
嵩擅政公倡首糾彈有鯁直聲致仕歸以永邑差煩賦

重呈請減三納七民困得蘇邑多徭獐設立一十三堡
夷類畏懾所著有西臺奏議

王貽德全州人嘉靖乙丑進士累官至雲南布政使萬
厯間計吏以清官稱天下第一詔加太僕寺卿歷子姓
五代皆登鄉薦

陳文明桂平人以明經入太學授福建松溪丞嘉靖中
倭犯閩所經諸邑俱破令懼欲棄城走文明獨集衆死
守時出兵與倭戰殺傷兩相當倭備諸巧攻城文明輒

設法拒之每以身誓衆凡相持三十五日外無援救竟敗倭去城賴以全陞廣東感恩知縣歸卒後五十餘年其邑人魏濬來粵督學始為全城紀略傳之

馬文祥字時明桂平人幼與弟文奇有志力學文奇薦於鄉文祥由貢授文昌知縣倡議省珠池無益之費未幾丁內艱復補宜城會肅皇帝南狩駐蹕茲邑霖雨連夕諸大臣恐恐文祥百務悉備稱上意既而遣科道稽沿途經費文祥以實聞言官屢薦受賞擢南京戶部主

事考滿乞休歸卒所著有西園傳美集

陳琚字宗玉南寧人由貢任德慶州判時羅旁寇熾流
毒郡縣衆推君材武提偏師相機撫勦遂殲厥渠魁降
服者受之為分什伍定約束俾與州人互市冀其感化
時有橐寇者嫉琚能內為離間琚密欲鋤之謀諸監司
不決復搆君于寇衷甲如市猝然變作琚麾市人搏戰
力不敵遂遇害後陽明擒寇魁趙木子殺之而祭于墓
倫太史謂其挺身殉職無歉公忠蓋實錄云

李獻忠蒼梧人嘉靖間承茶陵州以清謹著甫冠時父令文昌卒於官獻忠扶櫬還哀毀幾不能起酒葷不入口既葬廬墓繼居祖母喪居母喪一如也永康程文德主嶺表書院從之遊甚見禮焉

高瓊宜山人由歲貢授江西饒州經歷淮府奪民湖利爭訟不息瓊奉委處之帖然屢擒湖濱惡少盜賊屏息見獄宇傾圯因露宿呈堂修理苦無料瓊忽往湖口查船見湖中飄一木排正足修理人以為異

何世錦字伯炯興業人敦尚古道事親甚孝父嘗患瘡疾世錦躬侍湯藥洗滌旦夕不離其側後父歿哀毀幾絕寢苦枕塊不處私室嘉靖辛丑應歲貢卒業大學歸奉母惟謹課諸子以儒業嘗書訓辭於庭曰非仁母為非義母行夙夜匪懈無忝爾所生興俗尚健訟好賭博冠婚喪祭多不能如禮世錦著鄉約十條請於有司舉行之民風近賴以變家居二十餘年以母老不欲就仕母強之再三始赴部授南雄經歷到任三日即告歸當

道不允且委署始興適有豪強占民水利者前令不能
禁世錦斷以理法竟服之復陳情乞休歸之日行李蕭
然始興亞卿譚次川贈詩有云北堂千里夢仙舟一葉
輕行李無長物琴書滿舊簞比抵家母方卧病籲天願
捐已年以益母壽母卒不異喪父之初居喪如禮丙寅
其子以尚官戶部以事建言忤旨得罪下廷獄郎報至
舉家失措錦獨不變色且從容賦詩云平生教子惟忠
孝忽報郎官犯至尊果秉丹誠昭日月笑將淚雨洒乾

坤吟畢謂有子如此錫我之光矣卒年六十四詔以孝
行旌表其門

歐陽經字時用恭城人嘉靖甲戌歲薦為諸生時偶夜
出恍聞人聲爭避謂知州來視之杳無其人旦以白同
志咸竒之及謁選僅授閩都司經歷任九載有聲陞威
州知州始驗甫蒞任革里甲夙弊殆盡民歌廉愛生番
亂魚肉其民率熟番平之民賴安堵威民立去思碑
楊義臨桂人家故貧一僕賣酒義性仁厚靈川崔某逋

官儲三百金繫獄家人質產得金輸官過義僕所醉遺金行僕得金喜告義義曰急追歸金弗及翼日遺金者至義歸之遺金者分半謝義義不受崔得金輸官脫繫獄歸祈天報德後義子孫登科者相續

王慶字起吾新寧州人以明經授荊州經歷居官清廉持身謹慎孝友著聞子用霖用楫聯登賢書

拱時字道軒臨桂人嘉靖丙戌進士拱廷臣之子也少負雄略不事儒業惟習武經閑弓馬登嘉靖壬戌武進

士署本省正千戶奉調征古田時率所部南丹目兵奮
勇前驅多所擒馘敘功准實授復征平樂府江及昭平
四屯所至皆能破賊直抵巢壘屢有功歷指揮同知後
乞休歸時喜讀書有儒將風且御下以恩士卒樂為效
死故每戰輒有成功云

黃賜思恩那馬土司人本府廩生襲司職嘉靖三十五
年調征南贛有功陞行營都司僉事撫民有功

黎琳藤縣人性孝友侍母病三年如一日嘗以祖業讓

金史卷之十一
卷七十一
兄兄卒撫兄繼子如子判兩淮鹽運司廉正自持尋乞休家居賑貧恤孤邑人推重之

葛彥富川人以明經授廣東右衛經歷生平慎取與廣故多海舶稅當道者廉其守委權焉彥秋毫不入私橐歸家惟舊所携行李而已年八十卒

黎聰陸川人嘉靖間任武寧簿寬愛得民催科不擾旱荒捐俸作糜粥跣足祈禱雨亦隨至民賴存活二十四年歲運期迫民窮無措聰力補及額九年遷崇仁丞武

寧民遮道留之

梁壯字行之懷集人嘉靖甲午年貢任南海縣丞政尚寬平民頌之

倪景蘭字德馨全州人起家吏曹任合肥典史操持不染時郡守項喬慎與可獨重之轉吉安所吏目歷任十四年家無餘貲途次被盜會邏卒獲所盜物景蘭謂業已非我有竟不顧人以是高其有長者風

吳邦柱字殿卿上林人性至孝年十九補庠生選貢授

江西萬載訓導陞廣東保昌諭念親老告歸築精舍東林與諸老約率真會賦詩見志於紛華勢利淡如也親沒極哀一秉家禮年七十有八預示終期遺命治喪不用浮屠所著有尊孔錄專排佛老顏其堂曰敬恕叮嚀子孫於二字尤諄切云

張經敵子有才略弱冠襲指揮使握衛符以能聲歷擢至副總兵平弩灘降交南靖思田擢甲負弩以身先士卒故能成功總貴州戎務及提督江淮地方多勞勩人

以為啟義士之報云

趙希尹字樂耕全州人家素豐輕財好施慕范文正公
為人置義田三百畝以供享祀里中貧不能娶不能葬
者出資助之有忿爭者質之于公片語立折人方之王
彥方云會歲凶出米賑濟所活甚衆州守義其事上聞
又置義田數百畝以招四方之來學者嘗載米往湖南
彼地饑悉賑之仲子孟豪登嘉靖丙辰進士歷官僉憲
孫一鶴一鵠皆舉孝廉公膺褒封鄉評重之

王熙字元穆臨桂人少機警跌宕不羈既冠補庠生折節向學曰吾枉此生矣因作詩自警曰五賊紛紛擾我關主翁何事失防閑鋼刀不斬攻心寇浩氣焉能塞兩間熙有母晨昏具衣巾定省有事跪而請人猝見之驚而異曰王生狂熙行之自如也出入巾服止則危坐行則繩趨兄某賭飲不檢熙每飯必同兄餐至夜分兄不至不餐也兄卒化於檢谷平李公中督廣右學政羣諸生講聖賢學聘熙赴講稱曰元穆元穆云嘗讀書風峒

有云一勺寒泉慮不侵囊琴孤枕碧山陰山樓夜半天
風發老盡丘萬古心未幾卒或曰殆識云

鄧鑛字克柔南寧人隱居半村人稱為半村先生早孤
敦孝友尚恬淡或勸其習舉業鑛賦詩云野人耽得野
人趣老大何曾解讀書酌酒吟詩綠底事耕田鑿井更
何如未因紫氣騰霄漢自有春風到草廬聖代於今又
堯舜脚跟隨處可樵漁高尚之志類如此母多病累醫
弗效鑛遂潛心醫學而精通之母病獲安自是名籍甚

凡諸貴人窮民治療所加無不立應名聞督府檄至賜以醫官鑛勉受後以疾辭恬退隱居一小軒涉獵羣書吟咏自適高人達士咸與交遊有半村詩集行於世

何垕崇善人嘉靖時為郡諸生好登覽山水所至輒有題詠事父母至孝赴貢試比至聞父病癰即趨歸及家見父癰痛劇吮之痛稍定盥漱焚香祝天願以身代如是者數月父卒哀號徹晝夜路人為之泣下有司以聞詔加旌獎

竇桂全州人世業農事親以孝聞父賢母黃氏一時俱病桂齋戒禱告願以身代病劇痛泣籲天刻左臂肉密為羹以進父母食之甘病俱愈後母復病不起結廬守墓二年乃歸提學黃佐召見桂樸野一無所言第頓首而已乃用鼓樂迎至州學明倫堂禮而遣之

陳乾藤縣人天資穎異十歲通詩經善屬文母病疽乾日夕泣禱推已田以給諸弟一無所私令通山清慎自持以病歸士民思之

莫秉倫陽朔人窮究經史辟舉不就事母孝母歿哀毀骨立既葬終身廬墓以居有冬笋瑞竹之祥

陳大本陽朔人事母孝母死未葬會鄰家失火倉卒不能舉棺伏棺號哭天為反風其孝感如此

陳九鼎容縣人父璋嘉靖間任光祿監事璋偶疾思肉羹鼎割左股以進疾果愈縉紳高鼎孝直指旌其門

秦忠字節卿靈川人淳篤嗜學事父孝處鄉族惟謹以歲薦卒業成均除慈利簿在事五年公廉慈惠以請告

歸捷戶掃軌課耕讀崇禮讓里人重之

梁龍興業人家富苦學臨貢不赴三十喪妻不再娶行
年九十八歲讀書不倦有司重其行屢餽不受

黎伯寬陸川人聰之子任浙江西安主簿事親孝廬墓
三年鄉評重之有廬墓卷

彭永平樂人以貢入太學早喪父事母至孝食必甘羶
朔望拜禱為母祈年母死哀慟骨立三年不御酒肉復
捐田以惠族人嘉靖間部使者監司皆旌其門

李德經義寧人嘉靖二年賊出劫本村男婦概被擄德經亦在擄中見賊汚村婦自歎回日無面目相見遂拔賊刀斫數賊自刎而死鄉人義之

林致孝上思州人義士也年二十五有豪俠氣概嘉靖三十一年秋偽賊黃天賜叛巢于佛子墟致孝挺身入村以窺虛實冀乘間而陰斃之賊伏起被拘呵至再竟不撓屈賊壯其材武誘以降致孝叱罵聲色俱厲賊遂支解以殉州守聞而悲之贍其孤以田

李廷鸞蒼梧人上海周昇為巡檢死婦亦隨沒未幾昇子敏及婦廖氏亦疫死家僮二人亦亡其一遺子賢能長壽二人尚幼昇同官唐子高周壁共籍所有遺貲二百金寄廷鸞家亡何賢能復歿廷鸞家忽遭賊妹京娘為賊殺幸昇遺貲尚在廷鸞急出視唐周二人留長壽於家同居數年僉事袁凱聞其事歎曰義士哉彼異鄉乃爾況吾與周上海同里乎召長壽至細詢之因留官舍嘉勞廷鸞曰義士良厚且苦吾有甥女可妻長壽汝

莫慮周氏無種矣仍禮送廷鸞還其家

壯士李安富川人常熟縣簿李君宗昭之養子也素驍
勇嘉靖癸丑春倭奴嘯聚海上焚掠松江太倉安時時
欲赴鬪李君止之曰踰境殺賊非吾職也冬十月賊航
海犯常熟直抵福山鎮不兩日鎮無居人賊玩之分隊
逼尚墅去縣治僅八九里邑中騷動令王侯率民兵禦
之以李君為前鋒安從焉李君命之曰第先往以毒箭
潛布路口激之使來來且佯奔俟機發自中也安挾同

事一人躍馬而前遇賊七人安笑曰箭不須布吾執此而後朝食也時賊方劫民舍安隔水罵曰賊出就吾刃其一人超距而來安彎弩射之應弦而斃又二人馳刺安安連揮刀斷其手足而斃餘賊四人并力擊安安盾忽裂且蹶泥澤中遂遇害其先斃一人蓋倭奴酋長多力有長技者賊以是喪氣遂夜竄相與嘖嘖曰好漢好漢安年二十有四未配其系不可考死之日為十月十九日也王公謂其以死勤事法當祀以禮葬於北郊厲

壇之旁鑿穴得完壙若前人虛之以待者君子曰數之奇也亦義氣感召云

劉元相字我忠全州人性醇謹事繼母以孝聞隆慶丁卯舉於鄉累官嘉魚尹築堤有方邑為立祠轉肇慶別駕遷高州海防政皆協宜總制疏請加秩尋告歸

曹學參字唯齋全州人穆之曾孫也隆慶丁卯舉於鄉累官連山知縣有異政調新會近海多盜公募壯士緝之寇聞公名相戒無犯曹使君境遂引去以德化感人

民間舉子皆就公命名考最為天下第一以疾乞歸民
畫公像於三賢祠祀之所著有梅窩集弟學蘇萬厯癸
卯舉人瓊州別駕以廉能稱子正經萬厯丁酉經魁和
平知縣克守清白孫國珣崇禎丙子舉人通判撫州

張孫繩字約齋臨桂人隆慶戊辰進士授信州司李以
卓異徵入歷吏戶禮刑給事中正直不避權貴屢疏張
江陵奪情專政語甚峻出為陝西觀察尋引疾歸江陵
敗起浙憲轉蜀晉閩滇臬藩擢南都尹擊暴鋤强豪鷙

敘迹興利除害銳意便民閱五載致仕終養卒贈工部尚書賜祭葬廕一子

蔣資乾字天秩恭城人幼聰慧日記萬言年十七隆慶庚午舉於鄉署臨桂教諭以薦陞助教遷南刑部累遷郎中治獄持平於大憝不少假貸曾却巨豪賄金聲望蔚然未幾以疾卒於官弟資坤領萬厯戊子鄉薦署肥城教諭分校京闈所拔悉名士陞都勻推官值黔民凋弊一意思活之解官歸人稱二難

蔣遵箴全州人隆慶戊辰進士知萬安縣官至光祿少卿子仕忠萬歷癸丑進士官至貴州左布政卓有政聲聞譽並稱於時

梁國相賓州人隆慶庚午舉人歷任楚雄知府從征有功政多卓異寓全州

歐陽州字汝行恭城人性篤友恭事繼母孝隆慶壬午歲薦選東莞縣丞有能績尋致仕年八十終

朱棠懷集守禦所百戶隆慶二年山賊陳龍洲刼掠縣

境裳率兵截捕與賊戰於塔山麓力不敵死之四年僉事楊公遣官祭之扁其門曰旌揚忠義

韋一奇平南入隆慶中任教授以孝友著養親惟謹撫幼弟成立親亡獨任喪葬

郭應翰號義所懷集人萬厯癸酉舉人以感恩縣諭陞襄陽令興水利修學宮革羨耗繕城垣漢江患寇翰率兵進勦寇宵遁襄民德之

朱萃字中齋陽朔人萬厯癸酉舉人署始興學端已率

物勤於教人典南京試事得士甚著如都憲吳公之龍
憲長史公邦載大參楊公於庭並以名宦顯皆萃門下
士也擢定安令蒞治五年治洽政成而清操勁節尤為
海忠介所賞方報貳温州輒以忤權貴而罷

蔣季炯字和陽全州人萬厯癸酉舉人知閩清縣兼攝
福清相國葉臺山贈以詩云吏隱梅溪水共清鳬飛又
喜到江城桃花雨邑栽應遍麥穗三春瑞已成松舍月
明看鶴舞松庭雨過見苔生西郊不少干旌去誰似攀

轅此日情歷仕昆陽知州母老致仕

呂興周字渭南臨桂人萬厯丁丑進士歷官禮部祠祭郎中時福藩倚母鄭貴妃專寵陰欲奪嫡神宗將有二王并封之意舉朝無敢言公特疏爭之上感悟以是東宮不搖中外避之官至應天府丞以疾予告歸

楊際會字仕遇容縣人性敏好學萬厯丁丑進士知六安州尋以兄際熙巡按上江循例調潁州有巨豪武斷際會置之法郡人稱快晉戶部郎出守饒州時樂平饑

民嘯聚煽亂會單車諭散其黨亟發賑之遷閩臬參楚藩卒於官

張文熙字念華臨桂人廣記博聞萬厯丁丑進士讀書中秘改御史按陝西復按浙江壬午鄉場無主考文熙兼董之居官寬猛并濟值兵民兩變為解紛爭頃刻撫定人服其英決建祠祀之擢應天府丞歷太僕卿致仕歸以著述自娛戚里貧乏者周之著有壬癸草雲嵒集罔窠山房全集按浙錄救寧錄生子三玉輅衡皆以青

年同舉鄉試當事扁曰三鳳齊鳴

廖東晞字麗暘陽朔人萬厯壬午舉人累官肇慶海防同知馭下不激不峻而體格自肅吏稟其法民頌其清譚汝試字惟譽興業人仲父貴早喪以試嗣試事嗣母何孝謹何憶貴泣下不食試亦不食幼與從弟汝講同攻苦講先舉鄉書試與兄汝誠萬厯壬午同舉試為第一人縣故有續食錢試辭不受居何艱食粥哀毀如一曰何以孝節聞試陳情得旨旌揚

晏景卿鬱林人領萬歷壬午鄉書知青陽縣事尋轉瓊
州府同知有惠政親病躬藥餌忘寢食兩目幾廢猶強
鹽櫛以慰親念兄無子以次子嗣祭無田損己產立之
宦成後與總服之親共高曾居一畝之宅

曹學易字肖川全州人穆之曾孫萬歷壬午舉人累官
桂陽知縣愛民如子楚人誦之遷定番知州撫綏有方
尋歸老於家

明御史曹公諱學程者全州人別駕公諱銘五世孫也

銘以書經中正統丁卯經魁任潮州府判生樾生鵬
鵬生體元體元以子貴贈文林郎生學程公字希明號
心洛少秉性剛介穎而好學輒有志於古人及壯以詩
經中萬歷己卯鄉薦癸未登進士第甲申筮仕石首令
清江洲隱沒地建開平徭民賴以甦丙戌丁外艱歸庚
寅起復寧海令築海塘栽陂贖立五社倉嚴捍禦政成
而邑署產芝有斷續復生之異兩邑所活計萬人壬辰
擢廣東道御史公在神宗朝發奸摘伏不避權勢事有

不宜行者知無不言祛畿甸害孔凡十事念邊士久戍
詳述幽風以奏且帥屯戍墾荒畝計五千七百五十五
頃有奇奏立規制致有白鶩車前強項御史之號靈武
叛噓久逆顏行總督魏學曾罪至從軍公挺然錄其功
以上癸巳上欲虛震位議並封諸皇子垣臣王如堅史
孟麟寺臣朱維京王學曾涂傑等持不可俱罷免公疏
引九廟神靈入告有入讒佞拒忠諫溺衽席忽宗祊等
言並封之議雖寢寢實大拂上意尋以彗星變陳言曰朝

政久輟郊廟稀臨玉趾疎寢門彤廷罕召對語多直切
留中未報數建言撝聖怒書公名於御屏中官報曰萬
歲震怒公無強諫為也公不聽而諫益力會日本關白
新破朝鮮欲大舉入寇帝以朝鮮為我藩籬命將征討
師老無功樞臣議款乙未定日本封事本兵石星力主
封議公與同官劉躍毅然以為不可公上疏曰倭情叵
測若從其請又輕朝廷陛下獨不監南宋故事乎遂與
石星忤帝不懌竟遣亡賴子沈惟敬賫冊往封丙申倭

果敗盟惟敬就縛滑弁揚方亨復奏倭情無變請添冊
使上更命科臣往此時垣臣葉經美部臣樂元聲朱長
春相繼論星失策坐忤旨罷舉朝莫敢言公復義激于
中抗疏列七事之非內引秦檜史彌遠為戒外引蘇武
顏真卿為法固請罷封帝責規避詔縱騎逮問嬰三木
備五毒鉗杖交加體無完膚下公於理欽定大辟更以
方亨充使惟敬為副惟敬巧完封局為倭嚮道大掠朝
鮮喪師失地本兵石星逮獄廷臣請還公職責令監軍

以圖後効不報戍戍帝命劉將軍縱合麻陳二師征之
倭遁錦山殲焉海島悉平己亥東事成獻俘于廟上論
功賞賚有差獨不赦公公錮獄十有一年百折不回惟
以父西塘公不逮養為痛母太孺人垂白倚閭為憂忠
孝之悃發為聲詩有戀闕心猶在思親淚未乾主恩深
似海臣節炳如丹之句後思母成疾每歲朝審刑官見
其奄奄氣息無不相顧流涕都人環視語曰此曹御史
也有泣數行下者有不徒相泣且相慰者曰聖天子在

上必鑒宥毋過自苦以是刑官數擬矜疑得緩刑公數
四臨刑之夕同里在廷薦紳置酒相訣公痛飲達旦無
怖色從容上檻車後一日縛赴市曹行刑風霾蔽天木
拔瓦飛刑官復奏免猶未赦計十一年前後內閣翰林
臺省各部寺官及勲爵諸臣同聲救釋章凡三十上皆
不報屢荷兩宮調護之不解嚮戍公次子正儒仰天
泣曰父囚繫頻年子違侍萬里死者不可復生吾不忍
見父之刑與其偷生於世孰若相從地下乎乃徒步抵

都門入獄省視見父待斃狀嘔血數升昏仆就地幾絕復甦當即揮淚刺血草疏撾登聞鼓伏闕下奏曰臣祖母七十有九衰病侵尋自臣父逮繫以來母念子而心折淚枯子思母而形尪骨立祖母當垂死之年臣父無再生之日臣感慟悲激呼號無從瀝血陳情願以身代乞繫臣就戮釋父生還俾臣父歸侍祖母以伸母子之情臣得身報親恩以全父子之義不報越明年己亥秋決再上書曰臣之于君義無所逃無所逃則死生惟命

子之于父情無所解無所解則生死相關臣思皇上之法無可撓而臣父子之情不可割臣父之身皇上生成之身也命之死誠不敢不死臣之身臣父生成之身也見其死又安忍獨生臣心苦情迫自願面縛法場甘心代死萬一不蒙矜允臣有先臣父而死耳不報蒙不即加刑丙午復上書援洪武八年例淮安山陽民有罪繫獄其子請以身代又援嘉靖十四年例御史馮恩以建言忤旨其子行可請以身代二祖皆憐而釋之為請又

不報是歲遇上慈聖皇太后歲號肆赦刑部沈應文等
一本始蒙恩釋謫戍寧遠公乃星馳抵衛得間歸省不
逾年而太孺人不祿又逾年而公捐館後神廟崩光廟
相繼升遐熹廟天啟二年念公孤忠追贈太僕寺少卿
蔭一子入監讀書四年賜諭祭建祠于家廟之傍每歲
春秋有司祀焉公於本州入祀鄉賢於寧海祀名宦有
忠諫錄四卷藏于家公生正儀正儒正儀以父蔭撫州
別駕正儒庠生崇禎五年奉旨旌表孝子

舒弘志字心矩全州人尚書應龍子有奇才萬厯丙戌探花時對策多譏刺時政閣臣不敢置前列上覽策奇之拔置第三中外驚異稱上神明得人授編修博極羣書過目成誦下筆千言立就惜享年不永未展其蘊

蕭雲舉字允升宣化人萬厯丙戌進士選翰林官至禮部尚書平生嗜古著書其氣節文章有過人者卒謚文端

唐世堯號觀柏平樂人萬厯丙戌進士授寧波推官累

陞吏部文選郎壬辰以起廢忤上旨斥為民世堯雖僻處西粵而文章獨得正宗分考浙江主考廣東甄收多知名士其樹立綽有可觀而品行亦卓然不可及云

陶明禮平樂人萬厯丙戌進士知長樂縣以修廢事除煩苛忤當事貶驛丞隨復原官不赴居鄉佐修志書

袁鳴泰平樂人萬厯丙戌進士知青田縣丁父艱歸以孝聞補莆田直道與縉紳忤去官有紀行實錄

阮悲懷集人萬厯辛卯舉人初令英德調雩都從吉州

郭子章講學遷雷州別駕建義倉創學田致政歸奉母
龍氏年九十七終

常夢龍字仲洲恭城人萬厯甲午舉人任保定通判主
餉居庸關有能聲條陳漕運五款悉中時宜剔釐驛稅
節省稅羨歲餘二千三百金以助軍需不入私索陞本
府郡丞卒於官勒石建祠

常真傑恭城人萬厯甲午舉人知鄧川州先是鄧有水
患公曰奈何魚鼈吾民也乃捐俸鳩工築堤以禦鄧舊

有礦稅每歲入二千金民苦之公力為奏免郡人醵金為公壽公曰若以乃公為壟斷者乎既請免又利之是易注也卻之置書院延民間子弟讀書其中嘗夜呼酒聽書聲至雞鳴不倦一日聞子懋中舉鄉薦首即解印歸

龍國祿桂平人萬厯乙未進士授福建海澄令澄為漳之剏邑濱海多珍貨豪右漁獵其中又擁使時至閭閻受害國祿獨持清介不撓法阿縱民甚德之會有中之

者民騰喧撤業遮留兩臺交疏請數月後始得潛去其
立祠祀之累官重慶惠州岳州知府皆有善政以忤時
而罷所著有向若篇泝泝緒言

呂嗣簡字希翼臨桂人文簡公之長孫萬厯丁酉經魁
讀書別墅遠近從之遊執經問難者十六人雋去者十
五人其一人亦歲薦嗣簡值父病痢聞嘗糞苦則生甜
則死公為之嘗後母病篤痛不能終養一哭嘔血升餘
患瘵症遂不起卒年五十二

張孫美字亨齋臨桂人萬歷丁酉舉人任潮州教授啟
迪諸生進德修業擢四川定遠令興起教化勸課農桑
革除弊政士民戴之致仕歸

陳堯典字闕荒蒼梧人萬歷癸卯舉人選於潛令治簡
靜有循良風累遷韶州江防丞滇江故多盜禁約嚴肅
盜不敢犯後累陞敘州知府長蘆鹽運使時軍需孔亟
堯典力清弊孔悉完宿逋卒為豪商中傷罷歸

徐可行字心如宣化人萬歷甲辰進士歷戶部郎中時

邕舊例糧入公帑者凡三項民苦繁耗公奏請編為一
闔郡稱便壬子主試河南所拔多名流

呂大韶字明夔臨桂人丈簡公曾孫萬厯丙午舉人授
敘州推官丁父艱服闋補瑞州推官治獄明允署縣署
府政聲優異性骨鯁不合時宜挂冠歸不入公庭不會
賓客以詩酒自娛

蔣獻禎字鳳儀全州人萬厯己酉舉人知雲南歸化縣
多善政舉卓異調繁昆明陞南京工部主事欽差總督

江南七省糧餉便道旋里丁父艱服闋應補因母老不果行十有餘年隻字不入公門逐年買穀備賑饑民州人佩德

謝日昇字九如全州人萬厯己酉舉人任郡司馬於閩之三山值海寇亂監軍嚴肅僉推其能俸入皆以均分兩弟王太守國相額其堂曰孝友

唐允中灌陽人萬厯己酉舉人其父子繼仁德高隱公恂恂醇謹歷官廣東提舉黃州郡丞屢膺薦獎陞建昌

知府乞歸養親父年九十卒公哀毀過甚而歿

趙獻素字南石全州人萬厯壬子舉人歷官戶部郎中居官耿介尚氣節居鄉醇篤卓有古人風

唐世照灌陽人萬厯壬子舉人幼孤奉母以孝聞累官知蘄州廉敏有吏才時流賊張獻忠犯楚江黃騷動公設立三關募敢死士守禦間發伏兵屢殲渠賊城賴以全在任八年卒民歌思之記名宦

唐世熊灌陽人萬厯乙卯舉人崇禎初累官部郎轉永

平知府下車見居民村落丘墟極力撫綏民有起色九年秋復困於兵公捐俸賑救全活者萬餘人會宦者高起潛督邊勢赫奕監司以下莫不膝行惟謹公獨長揖不屈大拂其意後敘功應優陞僅移山東鹽運使十二年正月濟南城陷公守西門死之巡撫王觀國上聞有旨優卹

朱弘字海若臨桂人萬厯乙卯舉人授橫州學正教人必以孝弟為先遷知吳川時海寇為亂躬自臨戎守禦

巡按有墨綬書生也佩刀之贈晉知崖州禮士愛民興利剔弊士民甚德之守將妄以他事中傷崖人數百渡海代鳴其冤事白遂棄官歸

葉汝鑰字叔準橫州人年十四補郡弟子員事嫡母生母以孝聞萬厯乙卯舉於鄉以母老不上公車歲大饑道殣相望鑰為粥以待饑者數月不倦全活甚多子澍舉於鄉官兵部武庫員外郎

陸經術灌陽人萬厯乙卯舉人負性端方累官戶部主

事剛直忤宦官調綿竹令值流寇破川西公加築城垣
百計堵禦城賴保全收活流民以萬計題叙授川西兵
備僉事以憂歸士民泣留建祠以祀

文應麟字泰徵興安人萬厯戊午舉人任什邡縣有清
操時歲大旱應麟步禱峨嵋行烈焰中數日遂大雨民
賴有秋陞隴州牧州多旱田民不諳水利應麟教以水
車人甚便之丁憂歸隱居教授年七十一

鄧承券字鐵臣全州人萬厯戊午舉人歷任長沙知府

分巡湖南道居官剛介軍吏畏威士民懷德歸之日囊橐蕭然晏如也待人接物藹然一儒生

陶宗孔字凝一全州人萬厯戊午舉人任岳州推官九年灌園種蔬楚人目為青天不阿上官上官重之

謝啟翰字屏南全州人萬厯戊午舉人知永康縣居官有守及歸囊無餘物居鄉謹厚有古人風

曹國祺字介之全州人孝子正儒之子萬厯戊午舉人崇禎間兩令分宜加意撫字清標雅度初終不渝

呂大英字元聲臨桂人亦文簡曾孫萬厯丙午以廕讀書太學授惠州別駕署篆興寧革陋規裁冗費清盜源建學宮時地方惡俗人有隙即採斷腸草服之以藉圖賴公訪知諭百姓挖其根獲一石即准銷贖銀一兩毒山幾平時鄰境盜劫餉金數千公鞠之盜招金匿家竈旁兩起之不得金盜亦旋斃公慮供扳蔓引良民受害齋戒禱於城隍數日雷電大作擊盜匿賊處地為裂得金數百距前死盜所指賊處僅咫尺諸盜悚服願自首

不踰月原金俱完人咸服公神明感格轉王府長史以病乞休歸不事家人產而賑饑周急靡所吝惜

章極永福人任貴州黎平推官多善政乞歸甘貧樂道吟咏自適著有主靜遺編

張所蘊字壯猷恭城人性嗜古宗西銘之學事母至孝由萬厯明經授靈川訓導遷東安教諭轉黃州教授所至端師範出其門者率多名士咸稱張學博得橫渠之世業云所著有圖南會心錄

林翔鳳崇善人為諸生時里人有自鬻以葬其親者適翔鳳授徒歸即舉所得館金代贖之萬厯間歲薦授永平司理多所平反察劾不避權貴累陞黔僉事及歸一無所有人推其廉介云

潘積讓昭平人有雄畧時五山賊倚恃嵩穴嘯聚萬人屢征不獲積讓與把總王綱計誘擒之復議設兵守寧化里賴以安堵為人尚義濟人之急萬厯十三年大荒出田禾賑其鄉民與其部下兵役全活者甚多

梁允玳懷集人由明經萬厯七年任上海丞革去糧長
贄見銀八百兩隨陳一切運糧赴京陋規并華亭青浦
三邑概列欸於直指使者革之歲節省數千金會以憂
歸遂決志養母不復仕進與弟允環友文煥怡情山水
別號雲松

陳萬忠昭平人性澹淡常隱山林至耄耄未嘗一字入
公門好義樂施歲荒周恤里黨人高其風

李叢字德馨蒼梧人以歲薦司訓洛容秩滿貧不能赴

部歸設帳教讀環堵蕭然年高德盛年八十五卒

莫遺賢字賓廷陽朔人萬厯間以貢得武緣司訓教廸諸生津津不倦以養親歸色養備至思撫孤姪品誼卓然人欽其懿行

秦煒字浚明容縣人萬厯七年以歲貢知黃安縣耿直捐介恥媚上官邑當饑疫公捐俸請賑存活者三萬餘命會楚撫某齟齬索公不應遂得憾左遷而歸民畏壘祝之子時懋萬厯癸丑進士

廖東升字初暘陽朔人萬厯乙亥以選貢卒業南雍授
維揚別駕權稅儀真署篆滁陽除苛剔弊治狀課第一
以憂歸

戴之聘灌陽人篤學有文名萬厯間歲貢授廣東普寧
令有善政骨鯁不事逢迎改授益藩理問校尉有不檢
者輒以法繩之忤王意遂拂袖歸杜門著述教子窮經
二子明聖登戊午鄉薦歷官戶部郎以清節著明徵登
天啟甲子鄉薦隱居不仕明聖子宸眷復登崇禎鄉薦

人以為厚德之報云

陳志堯桂平人母病篤破指血書告天願以身代母病
尋愈事聞旌表

岑孝子貴縣人家貧傭鄰家甚孝日必三省其親以傭
直供甘旨親歿典地買棺鄉人樂助之仍傭於鄰必日
至墓前哀拜有司聞之月給祿米旌其門

高雲厚號農隱慶遠人生而穎異方弱冠能詩文事父
母極孝處兄弟友恭父母偶疾日侍湯藥頃刻不離父

年八十五母年八十五齊眉雙壽郡守給扁旌其孝
龍時吟恭城人父日昇積善好施與人無忤時吟為諸
生一遵父訓父死骨立三載母病劇籲天請代母忽甦
曰神增我壽一紀矣遂愈次兄乏嗣遺產悲與長姪而
已不與凡賑饑濟貧救患成父志也院道屢給旌賞
濮惟璋恭城人父邦德病璋日侍湯藥久未痊遂割臂
焚香籲天父病果愈公舉當道奏聞旌表建孝子坊後
父母年皆八十餘璋亦七十

全存義字終之靈川人性端慤事父母甚孝處族黨皆得其歡心兄弟七人少存德庶出且遺腹生父卒子母無倚義捐己所分產給之每朔望皆同堂聚食事有可否絕無忤言鄰里有訟勸之無不解者人稱其孝友李映暘字升台平樂人天啟辛酉舉人任山西大同推官明敏清介凡沈獄久不決者立決如神奉直指命巡邊凡所制置皆當於理以父艱歸服闋補四川龍安推官陞興化同知不就子思睿中崇禎癸未進士

歐國儒字景修平樂人天啟辛酉舉人累官至刑部郎中明允清慎方正不阿忤閹璫解綬歸

廖九成字念瀧全州人讀書有夙慧天啟辛酉舉於鄉歷仕永州郡丞多惠政

蔣維芬字蘭甫全州人天啟辛酉舉人知南陽縣多幹材薦陞永平推官先是南陽唐王欲圖不軌芬私察知密疏於朝懷宗怒收王禁錮高牆亦下芬於理後得白尋陞兵部武庫主事

謝天命字魯生全州人天啟辛酉舉人躬行實踐事親起居飲食旦暮必躬奉侍與弟震命互相師友掌教閩中諸生德之為立祠守龍安惠政種種可稱述

張茂梧字玉林臨桂人孫繩次子以解元登天啟壬戌進士任貴池知縣調繁改長洲皆以治狀稱擢御史彈劾不避權貴查督邊工以成績著尋致仕終養著易經了義行於世

唐際明字宅揆全州人天啟甲子舉人賦性純孝知雲

南楚雄縣監開銀礦一日可獲羨餘數百金公峻卻之
忽聞父訃即號泣謝事家人勸之遲報一月可獲萬金
公不聽服闋補善化縣時值湖南重鎮雲集兵戈搶攘
公撫字催科軍民安堵部院察其廉能擢監軍副使
唐良銳全州人天啟甲子舉人知靈璧縣死流寇張獻
忠之難詔贈山東僉事蔭一子入監讀書

蔣佳徵灌陽人天啟甲子舉人授盱眙令崇禎八年流
寇犯鳳泗盱眙無城可守居民悉奔竄公獨率家人堵

禦發伏殲賊賊怒襲而攻之公巷戰而死督撫疏聞詔
贈尚寶卿建表忠祠春秋崇祀

文昌時全州人天啟甲子舉人知臨淄縣以廉慎聞時
闖賊告亟人勸之避去昌時執不可城陷舉家自焚
蔣秉綵字衷白全州人天啟甲子舉人授靈丘令清廉
平易有古循吏風會流寇犯境秉綵曰吾當以死衛百
姓名募義旅憑城拒守城破罵賊而死闔家殉之

張茂植字培林臨桂人天啟時恩選事繼母至孝精岐

黃以藥濟人末年授高州教授

張宗煒字我見臨桂人以廕仕通政司經歷累遷戶部主事分司河西鈔務例得羨金三千餘屏不納掾吏以例不宜卻宗煒報部充軍餉遷郎中督理延綏糧餉時三邊重鎮軍兵數萬籌餉籌糧皆出機宜兵不敢噪尋知貴州鎮遠府到任二月苗寇亂郡故無城宗煒同民甘苦百計守禦蠟丸請兵武崗勦撫並用苗寇退士民安堵乞休致仕歸

龐希睿陸川人天啓間歲貢恬靜寡欲嘗路捨遺金數十兩覓失主而返之親喪哀毀骨立寢苦枕塊者三年廉孝之風可以勵俗

陳正孔全州人母唐氏病割左臂佐食以進病遂愈天啓七年巡按扁曰孝可維風每直指按粵俱賜粟

張昌胤全州人尚書潔之曾孫髫年聰穎年十五中天啓辛酉舉人年十八中崇禎戊辰會魁授庶吉士與太史金聲劉之倫倡明理學手著立志辨志諸篇年二十

卒鄉人咸惜其才

唐一中字可權全州人崇禎癸酉舉人專精古學從遊者多名士授鉅鹿教諭己卯寇陷城被執不屈死之

蔣季誠字明生全州人崇禎癸酉舉人知崇明縣多惠政邑人立祠尸祝


黃龍躍字惕菴全州人崇禎壬午解元甲申居京邸值閩變被賊執欲強以官公厲聲叱之賊不能屈遂間行至南都上疏寓書與家人訣曰天下事去矣我輩讀書

何事遂不知所終

梁方圖懷集人年十六而孤廬墓三年崇禎間以明經
歷象左二州教職陞平樂府授講學不倦督學黃景明
曰吾道在子矣粵俗停柩數十年不葬公力白上官一
時出喪者以數萬計未幾兵亂人咸感之兼攝太平學
篆其俗尚火葬公為刊家禮四訓約要以教民皆感化
致仕歸年八十四卒所著有五經要旨忠孝廉節等傳
羅奇杰懷集人邑庠生少孤事母至孝每晨衣冠入省

必跪拜牀下母多病奉藥餌寢食俱忘凡澣衣滌器皆
以身親之母歿年九十三泣血廬墓三載崇禎間直指
李仲熊表其宅曰孝行可風

蔣秉芳字昆瑞全州人博學能文明末流寇猖獗嘗作
南遷疏言金陵形勢及二祖並建兩都深意與却敵制
勝之方皆歷歷可施用關中李楷紀其事尋以明經授
柳城司訓賊至不屈死之



粵西文載卷七十一